



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/199/2024

Ո Ր Ո Շ ՈՒ Մ

ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

16 օգոստոսի 2024թ.

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող) Արամայիս Փաշինյանի և Լիլիթ Ալեքսանյանի (այսուհետ՝ Հանձնաժողով) 2024 թվականի օգոստոսի 16-ին քննելով «Քաղաքացիական պայմանագիր» կուսակցության (այսուհետ՝ Կուսակցություն) հաշվետու ժամանակահատվածում պաշտոնատար անձ՝ վարչության նախագահ (այսուհետ՝ Պաշտոնատար անձ), Սուրեն Պապիկյանի կողմից Վարչական իրավախախտումների վերաբերյալ օրենսգրքի (այսուհետ՝ Օրենսգրք) 189.15-րդ հոդվածի 3-րդ մասով նախատեսված զանցանքի հատկանիշներով առերևույթ խախտման կապակցությամբ հարուցված վարչական իրավախախտման վերաբերյալ թիվ ՎԻՎ/199/2024 գործը՝

Պ Ա Ր Ձ Ե Ց

I. Վարչական իրավախախտումների վերաբերյալ գործի վարույթի նախապատմությունը

1.1 Հանձնաժողովը, «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 27-րդ կետով սահմանված Հանձնաժողովի լիազորությունների շրջանակներում, նույն օրենքի 40.1-ին հոդվածով սահմանված կարգով իրականացնելով նույն օրենքի 23-րդ հոդվածի 1-ին մասի 9-րդ կետով վերապահված գործառույթը և հիմք ընդունելով Կուսակցության 2022 թվականի տարեկան հաշվետվության (այսուհետ՝

Տարեկան հաշվետվություն) ստուգման և աուդիտի արդյունքում վերհանված տվյալները, պարզել է, որ 2022 թվականի ընթացքում Կուսակցության Պաշտոնատար անձ Սուրեն Պապիկյանի կողմից չի պահպանվել «Կուսակցությունների մասին» սահմանադրական օրենքի (այսուհետ՝ Սահմանադրական օրենք) 23-րդ հոդվածի 7-րդ մասով սահմանված՝ Կուսակցության բոլոր դրամական վճարումներն անկանխիկ հաշվարկներով կատարելու պահանջը:

1.2 Հանձնաժողովի կողմից 2024 թվականի ապրիլի 1-ին Կուսակցությանն է ուղղվել թիվ 01/998-2024 գրությունը, որով Հանձնաժողովը խնդրել է Կուսակցության 2022 թվականի տարեկան հաշվետվության ստուգման նպատակով հնգօրյա ժամկետում Հանձնաժողովի պաշտոնական՝ info@cpcarmenia.am էլեկտրոնային փոստի հասցեին ուղարկելու միջոցով, առձեռն կամ փոստային առաքմամբ ներկայացնել Կուսակցության՝ 2022 հաշվետու տարվա բոլոր բանկային հաշիվների (բացառությամբ նախընտրական հիմնադրամների) վերաբերյալ տեղեկություններ, այդ թվում՝ բանկի կողմից վավերացված բանկային հաշիվների մուտքերի և ելքերի վերաբերյալ քաղվածքները (առկայության դեպքում նաև դրանց էլեկտրոնային տարբերակները), Կուսակցությանն անդամավճարներ վճարած անձանց՝ Կուսակցության անդամ հանդիսանալու, ինչպես նաև Կուսակցությանը անդամավճար վճարելու չափին, կարգին և ժամկետներին վերաբերող փաստաթղթերը:

Ի լրումն վերոգրյալի՝ Հանձնաժողովը նշված գրությամբ խնդրել է Կուսակցության 2022 թվականի տարեկան հաշվետվության աուդիտորական եզրակացությամբ, ինչպես նաև «Նամակ ղեկավարությանը» փաստաթղթով հայտնաբերված անհամապատասխանությունների և խախտումների հետ անհամաձայնության դեպքում ներկայացնել դրանց վերաբերյալ Կուսակցության դիրքորոշումն արտահայտող լրացուցիչ տեղեկություններ և փաստաթղթեր:

Հանձնաժողովը նշված գրությամբ միաժամանակ հայտնել է Օրենսգրքի 206.14-րդ հոդվածով նախատեսված վարչական պատասխանատվության մասին՝ Հանձնաժողովին սահմանված ժամկետում անհրաժեշտ տեղեկությունները կամ պահանջվող նյութերը չտրամադրելու համար:

1.3 Ի պատասխան Հանձնաժողովի 2024 թվականի ապրիլի 1-ի թիվ 01/998-2024 գրության՝ 2024 թվականի ապրիլի 8-ին Կուսակցության կողմից Հանձնաժողովի էլեկտրոնային փոստի հասցեին է ներկայացվել պահանջվող տեղեկատվությունը, այդ թվում նաև՝ 2022 հաշվետու տարվա կուսակցության բոլոր բանկային հաշիվների քաղվածքները:

1.4 Կուսակցության բանկային հաշիվների քաղվածքների տվյալների համաձայն՝ Կուսակցության քարտային հաշվից կատարված կանխիկացումները հաշվետու տարում կազմել են 10,907,000 (տասը միլիոն ինը հարյուր յոթ հազար) ՀՀ դրամ գումար:

1.5 Աուդիտորական եզրակացության բացասական կարծիքի հիմք հանդիսացող 3-րդ կետի համաձայն՝ «Կուսակցության քարտային հաշվից 2022 թվականի ընթացքում իրականացվել են ընդհանուր 11,387,000 (տասնմեկ միլիոն երեք հարյուր ութսունյոթ հազար) ՀՀ դրամի չափով կանխիկացումներ, ինչը հակասում է «Կուսակցությունների մասին» Սահմանադրական օրենքի 23-րդ հոդվածի 7-րդ մասի պահանջին՝ համաձայն որի Կուսակցությունը բոլոր դրամական վճարումները կատարում է անկանխիկ հաշվարկներով»:

1.6 Աուդիտորական եզրակացությամբ և Տարեկան հաշվետվության ստուգման արդյունքներով հայտնաբերված կանխիկացումների գումարների տարբերությունը պայմանավորված է (կարող է պայմանավորված լինել) Կուսակցության կողմից Հանձնաժողով ներկայացված բանկային հաշիվների քաղվածքների ոչ ամբողջական լինելով, մասնավորապես՝ քարտային հաշվի՝ Հանձնաժողով ներկայացված քաղվածքն ընդգրկում է 2022 թվականի հունվարի 17-ից մինչև դեկտեմբերի 31-ն ընկած ժամանակահատվածը: Հաշվի առնելով վերոնշյալը, ինչպես նաև այն հանգամանքը, որ Կուսակցությունը Հանձնաժողով չի ներկայացրել որևէ առարկություն Աուդիտորական եզրակացությամբ հայտնաբերված կանխիկացումների չափի վերաբերյալ՝ Հանձնաժողովի կողմից հիմք է ընդունվել Աուդիտորական եզրակացությամբ հայտնաբերված կանխիկացումների չափը:

1.7 Վերոնշյալ իրավախախտման հայտնաբերմամբ պայմանավորված՝ Հանձնաժողովը 2024 թվականի հուլիսի 19-ի թիվ 01/2020-2024 գրությամբ

Կուսակցության Պաշտոնատար անձ Սուրեն Պապիկյանին ուղարկել է ծանուցում՝ Կուսակցության կողմից դրամական վճարումների հաշվարկներն անկանխիկ չկատարելու գանցանքի հատկանիշներով առերևույթ իրավախախտման վերաբերյալ՝ հրավիրելով վերջինիս Հանձնաժողով՝ ծանուցումը ստանալուն հաջորդող 5-րդ աշխատանքային օրը՝ ժամը 14:30-ին՝ մասնակցելու Օրենսգրքի 189.15-րդ հոդվածի 3-րդ մասով նախատեսված վարչական իրավախախտման հատկանիշներով վարչական իրավախախտման վերաբերյալ արձանագրություն կազմելուն, իսկ 7-րդ աշխատանքային օրը՝ ժամը 14:30-ին՝ առերևույթ իրավախախտման հիմքով կազմված արձանագրության և վերաբերելի նյութերի հիման վրա վարչական իրավախախտման վերաբերյալ գործի քննությանը մասնակցելու: Սուրեն Պապիկյանի կողմից նշված գրությունը ստացվել է 2024 թվականի հուլիսի 26-ին:

1.8 2024 թվականի օգոստոսի 2-ին պատշաճ ծանուցված Սուրեն Պապիկյանի բացակայությամբ կազմվել է թիվ ՎԻՎ/421/2024 արձանագրությունը՝ Օրենսգրքի 189.15-րդ հոդվածի 3-րդ մասով նախատեսված իրավախախտման հատկանիշներով:

1.9 Հիմք ընդունելով Սուրեն Պապիկյանի կողմից 2024 թվականի օգոստոսի 6-ին Հանձնաժողով մուտքագրված թիվ Մ-3513-2024 գրությամբ ներկայացված միջնորդությունը՝ Հանձնաժողովը նշանակված գործի քննությունը հետաձգել է և նշանակել 2024 թվականի օգոստոսի 16-ին՝ ժամը 14:45-ին, և Հանձնաժողովի 2024 թվականի օգոստոսի 8-ի թիվ 01/2456-2024 գրությամբ ծանուցել վարույթի մասնակցին վարչական իրավախախտման վերաբերյալ գործի քննության տեղի և ժամանակի մասին:

1.10 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված (հիմք՝ AL0123931916AM հետադարձ հանձնման ծանուցագիր) Սուրեն Պապիկյանի բացակայությամբ 2024 թվականի օգոստոսի 16-ին՝ ժամը 14:45-ին, տեղի է ունեցել վարչական իրավախախտման վերաբերյալ գործի քննություն:

II. Վարույթի մասնակցի ներկայացրած դիրքորոշում ու պարզաբանումներ

Սույն վարույթի շրջանակներում վարույթի մասնակցի կողմից դիրքորոշում և պարզաբանումներ չեն ներկայացվել:

III. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/199/2024 գործում առկա նյութերը, Կուսակցության Տարեկան հաշվետվությամբ ներկայացված տվյալները՝ համադրելով դրանք Կուսակցության բանկային հաշիվների քաղվածքների հետ և հաշվի առնելով Աուդիտորական եզրակացությամբ հայտնաբերված առերևույթ խախտումները՝ կատարել հանգամանքների քննություն, որի արդյունքում հաստատված է համարում.

3.1 2022 թվականի ընթացքում Կուսակցության Պաշտոնատար անձ Սուրեն Պապիկյանի կողմից չի պահպանվել Սահմանադրական օրենքի 23-րդ հոդվածի 7-րդ մասով սահմանված՝ Կուսակցության բոլոր դրամական վճարումներն անկանխիկ հաշվարկներով կատարելու պահանջը, մասնավորապես՝ 2022 թվականի ընթացքում Կուսակցության քարտային հաշվից իրականացվել են ընդհանուր 11,387,000 (տասնմեկ միլիոն երեք հարյուր ութսունյոթ հազար) ՀՀ դրամի չափով կանխիկացումներ:

3.2 Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ Սուրեն Պապիկյանը հաշվետու ժամանակահատվածում (16.08.2019 - 20.01.2023թթ.) հանդիսացել է Կուսակցության գործադիր մարմնի ղեկավար՝ վարչության նախագահ:

3.3 Կուսակցության կանոնադրության 64-րդ կետի 9-րդ ենթակետի համաձայն՝ Վարչության նախագահը կանոնադրությամբ նախատեսված կարգով տնօրինում է Կուսակցության գույքը, այդ թվում՝ ֆինանսական միջոցները:

IV. Որոշումն ընդունելու իրավական հիմքերը և հիմնավորումները

4.1 «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 9-րդ կետի համաձայն՝ Հանձնաժողովի գործառույթներն են՝ «Կուսակցությունների մասին» սահմանադրական օրենքով սահմանված դեպքերում և

կարգով կուսակցությունների ընթացիկ ֆինանսական գործունեության նկատմամբ վերահսկողության իրականացումը, ներառյալ՝ կուսակցությունների ֆինանսական միջոցների աղբյուրների և ծախսերի, ինչպես նաև գույքի մասին տարեկան հաշվետվությունների (այսուհետ՝ կուսակցությունների տարեկան հաշվետվություններ) ներկայացման պահանջների պահպանման և դրանցում առկա տեղեկատվության և տվյալների արժանահավատության և ամբողջականության ստուգումը:

4.2 «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 27-րդ կետի համաձայն՝ Հանձնաժողովը ստուգում է կուսակցությունների տարեկան հաշվետվությունների ներկայացման պահանջների պահպանումը և դրանցում առկա տեղեկատվության և տվյալների արժանահավատությունն ու ամբողջականությունը:

4.3 Սահմանադրական օրենքի 30-րդ հոդվածի 1-ին մասի համաձայն՝ կուսակցությունների ընթացիկ ֆինանսական գործունեության նկատմամբ վերահսկողությունը, ներառյալ՝ կուսակցությունների տարեկան հաշվետվության ստուգումն իրականացնում է Կոռուպցիայի կանխարգելման հանձնաժողովը՝ սույն օրենքով և «Կոռուպցիայի կանխարգելման հանձնաժողովի մասին» օրենքով սահմանված կարգով:

4.4 Սահմանադրական օրենքի 23-րդ հոդվածի 7-րդ մասի համաձայն՝ կուսակցությունը բոլոր դրամական վճարումները կատարում է անկանխիկ հաշվարկներով:

4.5 «Անկանխիկ գործառնությունների մասին» օրենքի 3-րդ հոդվածի 1-ին մասի 1-ին կետի համաձայն՝ անկանխիկ ձևով գործառնություն (վճարում) է համարվում կանխիկ կամ անկանխիկ եղանակով նախաձեռնած վճարումը, որն ուղղված է (փոխանցվում է) շահառուի (վճար ստացողի) բանկային հաշվին, կամ անկանխիկ եղանակով նախաձեռնած վճարումը, որն ուղղված է (փոխանցվում է) շահառուի (վճար ստացողի) էլեկտրոնային փողի հաշվին: Ընդ որում, անկանխիկ եղանակով նախաձեռնած վճարում է համարվում նախաձեռնողի բանկային կամ էլեկտրոնային փողի հաշվից կատարված վճարումը (փոխանցումը):

4.6 Օրենսգրքի 189.15-րդ հոդվածի 3-րդ մասի համաձայն՝ Կուսակցության կողմից դրամական վճարումների հաշվարկներն անկանխիկ չկատարելը՝ առաջացնում է տուգանքի նշանակում՝ կուսակցության պաշտոնատար անձի նկատմամբ՝ սահմանված նվազագույն աշխատավարձի հարյուրապատիկից մինչև երկուհարյուրապատիկի չափով:

4.7 Օրենսգրքի 14-րդ հոդվածի 2-րդ պարբերության համաձայն՝ սույն օրենսգրքի իմաստով՝ կուսակցության պաշտոնատար անձ է համարվում կուսակցության կանոնադրության կամ այլ փաստաթղթերի հիմքով՝ սույն օրենսգրքով պատասխանատվություն առաջացնող գործողությունների (անգործության) համար պատասխանատու կուսակցության ղեկավար մարմնի անդամը կամ կուսակցության՝ կազմակերպական-տնօրինչական, վարչատնտեսական գործառույթներ իրականացնող պատասխանատու անդամը կամ աշխատողը:

4.8 Օրենսգրքի 244.17-րդ հոդվածի համաձայն՝ սույն օրենսգրքի 166.1-ին, 169.28-րդ, 169.31-րդ, 189.13-րդ, 189.14-րդ, 189.15-րդ, 189.16-րդ, 189.19-189.24-րդ, 206.14-րդ հոդվածներով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Կոռուպցիայի կանխարգելման հանձնաժողովը:

4.9 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.10 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք

կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.11 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.12 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.13 Օրենսգրքի 275-րդ հոդվածի համաձայն՝ վարչական իրավախախտման վերաբերյալ գործը քննության նախապատրաստելիս մարմինը (պաշտոնատար անձը) լուծում է հետևյալ հարցերը՝

- 1) տվյալ գործի քննությունը վերաբերում է, արդյոք, իր իրավասությանը.
- 2) ճիշտ են կազմվել, արդյոք, վարչական իրավախախտման վերաբերյալ գործի արձանագրությունը և մյուս նյութերը.
- 3) գործի քննությանը մասնակցող անձինք ծանուցվել են, արդյոք, դրա քննության ժամանակի և տեղի մասին.
- 4) պահանջվել են, արդյոք, անհրաժեշտ լրացուցիչ նյութեր.
- 5) վարչական պատասխանատվության ենթարկվող անձի, տուժողի, օրինական ներկայացուցիչների, փաստաբանի միջնորդությունների մասին:

4.14 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին: Գործի վարույթը կարճելու մասին որոշում ընդունվում է նաև բանավոր դիտողություն հայտարարելու դեպքում:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենսգրքի 189.15-րդ հոդվածի 3-րդ մասով նախատեսված դրույթը նպատակ է հետապնդում ապահովելու հաշվետու տարվա ընթացքում Կուսակցության ֆինանսական միջոցների և ծախսերի վերաբերյալ հանրային հաշվետվողականությունը, կոռուպցիոն ռիսկերից զերծ գործունեությունն, ինչպես նաև ֆինանսական մուտքերի և ելքերի անկանխիկ եղանակով իրականացման միջոցով բարձրացնել Կուսակցության գործունեության ֆինանսական թափանցիկության մակարդակը:

Միաժամանակ, Սահմանադրական օրենքի 23-րդ հոդվածի 7-րդ մասի նպատակն է կուսակցության գործունեության ֆինանսական թափանցիկության մակարդակը բարձրացնելը, որն ամրագրված է ««Կուսակցությունների մասին» սահմանադրական օրենքում լրացումներ և փոփոխություններ կատարելու մասին» 2021 թվականի հունվարի 18-ի ՀՕ-1-Ն սահմանադրական օրենքի հիմնավորմամբ, ինչից հետևում է, որ Օրենսդիրը, նման կարգավորում ամրագրելով, նպատակ է ունեցել ապահովել կուսակցությունների կողմից իրականացվող ֆինանսական գործարքների թափանցիկությունը, հաշվետվողականությունը և վերահսկելի լինելը՝ նման կերպ փորձելով նպաստել ֆինանսական գործարքների պատշաճ կերպով փաստաթղթավորմանը, ինչն անհրաժեշտության դեպքում հնարավորություն կտա աուդիտի, ինչպես նաև լիազոր մարմնի կողմից համապատասխան ստուգում իրականացնելու դեպքում հավաստիանալ իրականացված գործարքների օրինականության հարցում:

Եսախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյոք արարքը կարող է պարունակել Օրենսգրքով սահմանված արարքի հատկանիշներ և

այնպիսի էական վնաս է պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Հանձնաժողովը հաստատված է համարում, որ սույն գործով կատարված արարքով, այն է՝ Օրենսգրքի 189.15-րդ հոդվածի 3-րդ մասով նախատեսված վարչական իրավախախտմամբ, խաթարվել է վկայակոչված նորմերով Օրենսդրի կողմից հետապնդվող նպատակը, քանի որ Կուսակցության կողմից չի պահպանվել դրամական վճարումների հաշվարկներն անկանխիկ կատարելու պահանջը:

Վերոշարադրյալի արդյունքում սույն գործով Կուսակցության կողմից խախտվել է Սահմանադրական օրենքի 23-րդ հոդվածի 7-րդ մասի պահանջը՝ Կուսակցության կողմից դրամական վճարումներն անկանխիկ հաշվարկներով կատարելու առնչությամբ, որի արդյունքում թույլ է տրվել Օրենսգրքի 189.15-րդ հոդվածի 3-րդ մասով սահմանված արարքը:

Վերը նշված օրենսդրական դրույթների և սույն գործով առկա փաստերի համադրության արդյունքում պարզ է դառնում, որ Կուսակցության քարտային հաշվից կատարված կանխիկացման գործառնությունները նախաձեռնված են եղել անկանխիկ եղանակով, սակայն ուղղված չեն (չի փոխանցվել) եղել շահառուի (վճար ստացողի) բանկային հաշվին, քանի որ Կուսակցության բանկային հաշիվների քաղվածքների ուսումնասիրությամբ պարզվել է, որ դրանք կանխիկացվել են բանկոմատների միջոցով:

Միաժամանակ, Կուսակցության բանկային հաշվի քաղվածքների ուսումնասիրությամբ ձեռք չեն բերվել այնպիսի տվյալներ, որոնք հնարավորություն կտային ենթադրելու, որ այդ կանխիկացված դրամական միջոցները հետագայում մուտքագրվել են Կուսակցության բանկային հաշիվներին:

Օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները

և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ:

Միաժամանակ, Կուսակցության կանոնադրության 64-րդ կետի 9-րդ ենթակետի համաձայն՝ Վարչության նախագահը կանոնադրությամբ նախատեսված կարգով տնօրինում է Կուսակցության գույքը, այդ թվում՝ ֆինանսական միջոցները:

Արդարադատության նախարարության իրավաբանական անձանց պետական ռեգիստրի գործակալության գրանցամատյանում առկա տեղեկատվության համաձայն՝ Սուրեն Պապիկյանը հաշվետու ժամանակահատվածում հանդիսացել է Կուսակցության գործադիր մարմնի ղեկավարը՝ վարչության նախագահը:

Հաշվի առնելով վերոնշյալը՝ Սուրեն Պապիկյանը որպես Օրենսգրքի 14-րդ հոդվածով նախատեսված Կուսակցության Պաշտոնատար անձ ենթակա է պատասխանատվության Օրենսգրքի 189.15-րդ հոդվածի 3-րդ մասով սահմանված արարքի համար:

Միաժամանակ, հաշվի առնելով, որ Օրենսգրքի 189.15-րդ հոդվածի 3-րդ մասով սահմանված արարքի համար նախատեսված է վարչական պատասխանատվության ոչ հստակ սահմանաչափ (***տրուզանքի նշանակում՝ սահմանված նվազագույն աշխատավարձի հարյուրապատիկից երկուհարյուրապատիկի չափով***), Հանձնաժողովն արձանագրում է, որ Օրենսգրքի 189.15-րդ հոդվածի 3-րդ մասով վարչական տույժ կիրառելիս պետք է հաշվի առնել ինչպես խախտման բնույթը, այնպես էլ պատասխանատվությունը ծանրացնող կամ մեղմացնող հանգամանքները:

Սույն գործով առկա փաստական հանգամանքների վերլուծության արդյունքում Հանձնաժողովն էական է համարում այն հանգամանքը, որ նշված իրավակարգավորմամբ նախատեսված իրավախախտումների վերաբերյալ գործերով քննության իրավասությունը Հանձնաժողովին վերապահելուց հետո, նշված դրույթը խախտված լինելու առնչությամբ արարքը հայտնաբերվել և նշված խախտման կապակցությամբ վարույթի մասնակցին ծանուցում է ներկայացվել առաջին անգամ:

Հանձնաժողովը գտնում է, որ սույն գործով առկա չէ Օրենսգրքի 34-րդ հոդվածով նախատեսված վարչական իրավախախտման համար պատասխանատվությունը

ծանրացնող, ինչպես նաև Օրենսգրքի 33-րդ հոդվածով նախատեսված վարչական իրավախախտման համար պատասխանատվությունը մեղմացնող որևէ հանգամանք:

Հիմք ընդունելով ամբողջ վերոգրյալը և ղեկավարվելով «Կոռուպցիայի կանխարգելման հանձնաժողովի մասին» ՀՀ օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 28-րդ կետով, 26-րդ հոդվածի 3-րդ մասով, Օրենսգրքի 189.15-րդ հոդվածի 3-րդ մասով՝ Հանձնաժողովը.

Ո Ր Ո Շ Ե Ց

1. Կուսակցության կողմից դրամական վճարումների հաշվարկներն անկանխիկ չկատարելու համար Կուսակցության Պաշտոնատար անձ Սուրեն Պապիկյանի նկատմամբ կիրառել վարչական տույժ **100,000 (հարյուր հազար) ՀՀ դրամի չափով:**

2. Տուգանքը պետք է վճարվի գանձապետական **900005001335** «Իրավախախտումների համար կիրառվող վարչական տուգանքներ և պատժամիջոցներ» **հաշվեհամարին՝** վճարման անդորրագրի «նպատակ» դաշտում պարտադիր նշելով **սույն որոշման համարը:**

3. Սույն որոշումն ուժի մեջ է մտնում Սուրեն Պապիկյանին այն սահմանված կարգով հանձնելու (հանձնված համարվելու) հաջորդող օրվանից:

4. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

Հ Ա Ն Ձ Ն Ա Ժ Ո Ղ Ո Վ Ի Ն Ա Խ Ա Գ Ա Հ Ի

Պ Ա Ր Տ Ա Կ Ա Ն Ո Ւ Թ Յ Ո Ւ Ն Ն Ե Ր Ը Կ Ա Տ Ա Ր Ո Ղ՝

Մ Ա Ր Ի Ա Մ Գ Ա Լ Ս Տ Յ Ա Ն